

आकाशवाणी

खास-खास खबरां:-

1. प्रधानमंत्री नरेन्द्र मोदी हो'र अज्जै थमां 2 दिन दे मलेशिया दौरे पर जा'रदे न
2. केन्द्रीय गृहमंत्री अमित शाह अज्ज जम्मू च उच्च सतह दी बैठक च विकास कम्मै दा जायजा लैगन।
3. भारत नै इस्लामाबाद च मसीतें च होए दे धमाके दी निंदेया कीती ऐ।
4. सरकारै "प्रधानमंत्री आवास योजना ग्रामीण" तैहत राज्यें ते केन्द्र शासित प्रदेश लेई 3 करोड़ 87 लख घरें दे निर्माण गी मंजूरी दिती ऐ।
5. ते भारत नै U-19 क्रिकेट विश्व कप दा खिताब रिकार्ड 6मीं बारी अपने नां कीता। राष्ट्रपति द्रौपदी मुरमू- उपराष्ट्रपति वी.पी. राधाकृष्णन ते प्रधानमंत्री नरेन्द्र मोदी होरें टीम गी बधाई दिती।

<><><><><><>

PM-Kualalumpur

प्रधानमंत्री नरेन्द्र मोदी हो'र अज्जै थमां 2 दिन दी मलेशिया यात्रा पर जा'रदे न। यात्रा दौरान दवै पक्ख अपनी रणनीतिक सांझेदारी सनें होरनें क्षेत्रें च सरबंघें गी मज़बूत करने पर चर्चा करगन। मलेशिया च भारत दे उच्चायुक्त वी.एन. रेड्डी होरें आखेया जे दौनें पक्खें बश्कार गल्लबात च बपार ते अर्थ-बवस्था- उभरदी टेक्नोलॉजी- ऊर्जा ते शिक्षा दे मुद्दे प्रमुख होगन- किजे दवै मुख्य नमें क्षेत्रें च बी अपने सरबंघें दा विस्तार करना चाहंदे न। प्रधानमंत्री हो'र प्रवासी भारतीय समुदाय कन्नै बी मलाटी करगन। राजधानी कुआलालंपुर च "सेलामत दातंग मोदी जी" कार्यक्रम होग- जेड़ा दौनें मुख्य दे लोकें दे मज़बूत सरबंघें गी दर्शादा ऐ। इस कार्यक्रम च खरी मती गिनतरी च लोकें दे शामिल होने दी मेद ऐ। कार्यक्रम च मलेशिया दे कलाकार सांस्कृतिक कार्यक्रम पेश करगन। इस सामुदियाक कार्यक्रम गी प्रधानमंत्री मोदी ते मलेशिया दे प्रधानमंत्री अनवर इब्राहिम सांझे तौर पर सम्बोधित करगन । दौनें पक्खें बश्कार शिष्टमंडल स्तह दी गल्लबात होग ते समझौतें दा आदान प्रदान कीता जाग।

<><><><><><>

HM -Jammu

गृहमंत्री अमित शाह – जम्मू-कश्मीर च विकास कम्मै दा आंकलन करने लेई अज्ज बडुलै जम्मू च इक उच्ची सतह दी समीक्षा बैठक दी प्रधानता करगन। साढ़े जिला संवाददाता दी रिपोर्ट मुजब- इस बैठक दुरान ढांचागत विकास आले प्रोजेक्टें- सिडकें दे विकास- केन्द्र आसेया चलाई जा'रदी योजनाएं ते पूरी- पराती प्रशासनिक प्रगति पर मुख करी ध्यान दिता जाहग। वरिष्ठ प्रशासनिक अधिकारी ते सरबंघत विभागें दे बडु अफसर बी इस बैठक दुरान मजूद रौहगन। एहदे शा पैहले गृह मंत्री अमति शाह हो'रें कल बी इक उच्ची सतह दी सुरक्षा समीक्षा बैठक दी प्रधानता कीती ही ते कन्नै हीरानगर सैक्टर च गुरनाम ते बोबिया आली सरहदी चौकियें दा दौरा लाया हा। उ'नें बन्ने पारा थमां घुसपैठ रोकने लेई बी.एस.एफ आसेया कीते गेदे बंदोबस्तें दा निरीक्षण कीता। इस मौके पर बोलदे होई शाह हो'रें आप्रेशन सिंदूर दौरान महत्वपूर्ण भूमिका लेई बी.एस.एफ दी सराहना कीती।

<><><><><><>

Amit Shah Visit- Chhatisgarh

केन्द्रीय गृह ते सहकारिता मंत्री अमित शाह अज्ज संजा छत्तीसगढ़ दे त्रै-रोजा दौरे पर रायपुर पुजा'रदे न। इस दौरान ओह राज्य च आंतरिक सुरक्षा स्थिति ते वामपंथी उग्रवाद दी समीक्षा करगन। ओह रायपुर ते जगदलपुर दे कार्यक्रमें च बी हिस्सा लैगन। शाह हो'र अज्ज संजा रायपुर च वरिष्ठ अधिकारियें कन्नै बैठक च राज्य कन्नै जुड़े दे प्रशासनिक ते सुरक्षा सरबंघी विशें पर चर्चा करगन। कल शाह हो'र वामपंथी उग्रवाद पर रायपुर च आयोजित सुरक्षा बैठक दी अध्यक्षता करगन। बैठक च वरिष्ठ अधिकारी ते सुरक्षा एजेंसियें दे प्रतिनिधि बी शामिल होगन। शाह हो'र कल गै रायपुर च आयोजित राष्ट्रीय कन्कलेव च बी हिस्सा लैगन। ओह सोमवार गी जगदलपुर च बस्तर पंडुम महोत्सव दे समापन समारोह च शामिल होगन।

<><><><><><>

MEA –Pak Attack

भारत नै इस्लामाबाद दी इक मसीतै च होए दे आत्मघाती बम्ब हमले दी निंदेया करदे होई एहदे च होए दे जानी ते माली नुक्सान पर दुख प्रगट कीता ऐ। विदेश मंत्रालय नै आखेया ऐ जे पाकिस्तान गी लोड़चदा ऐ जे ओ अपने समाजी ताने-बानें कन्नै जुड़ी दियें समस्याएं गी संजीदगी नै लै ते इनेंगी पैहल दी बिनाह पर नबेड़े लेई जत्त करै। मंत्रालय दा आक्खना ऐ जे एह बड़ी मंदे भागें आहली गल्ल ऐ जे पाकिस्तान अपने अंदरुनी मसलें गी हल्ल करने दे बजाए- होरनें गी इंदा दोषी दस्सियै अपने-आपै गी न्हरे च रक्खै करदा ऐ। भारत नै पाकिस्तान आसेया ओहदे पर लाए गेदे बे-मतलब ते बे-बुनियादी आरोपें गी बी सिरे थमां खारज करी दिता ऐ।

<><><><><><>

Army Chief Visit

सेना प्रमुख जनरल उपेन्द्र द्विवेदी होरें कल जम्मू-कश्मीर च सेना दी व्हाइट नाइट कोर मुख्यालय दा दौरा लाया ते खित्ते च मजूदा सुरक्षा हालात ते कारवाइयें सरबन्धि तयारियें दी समीक्षा कीती। इस दौरान उनें गी आतंकवाद पर रोक लाने लेई कीते गेदे बंदोबस्तें बारे तफसीली जानकारी दिती गेई-जेहेद पर उनें इनें तयारियें ते बक्ख-बक्ख सुरक्षाबलें बश्कार आपूं-चे दे तालमेल ते सहयोग दी सराहना कीती। दौरे दौरान सेना प्रमुख होरें सरबन्धित सभ्भन धड़ें दियें कोशशें ते सहयोग दी सराहना कीती ते सतर्कता बरोबर बनाई रक्खने दी जरूरत पर जोर दिता। उनें कुसै बी इलाके च कारवाई दौरान आम जनता दी सुरक्षा ते हितें दा चेचा ध्यान रक्खने पर जोर भरेया। उनें मेद प्रगट कीती जे व्हाइट नाइट कोर दा नेतृत्व ते सैनिक इलाकें च रमानदारी ते सुरक्षा हर कीमत पर बनाई रक्खने च कामयाब रौहगंन।

<><><><><><>

PMAY -Houses

“प्रधानमंत्री आवास योजना ग्रामीण” दे तैहत सरकार नै राज्यें ते केन्द्र शासित प्रदेशें गी 3 करोड़ 87 लक्ख थमां मते घरें गी मंजूरी दिती ऐ। ग्रामीण विकास राज्यमंत्री डाक्टर चन्द्र शेखर पेम्मा सानी होरें कल राज्यसभा च दस्सेया जे इस बरे 2 फरवरी तगर 2 करोड़ 95 लक्ख थमां मते घरें दा निर्माण पूरा होई चुके दा ऐ। उनें दस्सेया जे पिच्छले 5 बरें च 2 करोड़ 10 लक्ख 66 ज्हार थमां मते मकानें गी मंजूरी दिती गेई ऐ। ग्रामीण विकास मंत्रालय पैहली अप्रैल 2026 सोयां “प्रधानमंत्री आवास योजना ग्रामीण” दी अमलावरी करा’रदा ऐ जेदा लक्ष्य मार्च 2029 तगर 4 करोड़ 95 लक्ख घरें दा निर्माण करना ऐ।

<><><><><><>

France –Canada Open Consulates in Greenland

फ्रांस ते कनाडा नै ग्रीनलैंड दी राजधानी नुक च वाणिज्य दूतावास खोले न। एह गैंड नाटो देश डेनमार्क दे प्रति समर्थन जाहिर करने आस्तै कीता गया ऐ- किजे अमरीका दे राष्ट्रपति डोनाल्ड ट्रम्प- ग्रीनलैंड गी हासिल करने दी अपनी मंग परतियै पुट्टा’रदे न। फ्रांस दे नमें महावाणिज्य दूत जीन-नोएल पोइ-रिपयर होरें आखेया जे ग्रीनलैंड च उंदी नियुक्ति अमरीकी प्रशासन गी सारत देने आस्तै नैई- सगुआ ग्रीनलैंड ते डेनमार्क दी दोस्ती दा सनेहा देने लेई ऐ। डेनमार्क च फ्रांस दे राजदूत क्रिस्टोफ पैरिसोट होरें आखेया जे वाणिज्य दूतावास छड़ा इक प्रतीक नैई ऐ- सगुआं त्रौनें यूरोपीय मुलखें बश्कार सहयोग ते गठबंधन गी दर्शाने आहली इक ठोस गैंड ऐ। कनाडा नै दिसम्बर 2024 च ग्रीनलैंड च वाणिज्य दूतावास खोलने दी घोषणा कीती ही।

<><><><><><>

ECI -SIR

चुना आयोग नै उत्तर-प्रदेश च मतदाताएं दी नमें सिरेया व्यापक नजरसानी आहले अभियान SIR तैहत दावे ते ऐतराज दर्ज कराने दी खीरी तरीक अगड़े बदाई दिती ऐ। मतदाता फार्म 6-7 ते 8 जेहड़े नमें नां जोड़ने- कोई गलती ठीक करने ते नां हटाने लेई हुंदे न- हून 6 मार्च 2026 धोड़ी जमा करोआई सकदे न। एहदे शा पैहले एहदे लेई खीरी तरीक 6 फरवरी 2026 रक्खी गेदी ही। उत्तर-प्रदेश दे मुख चुनां अधिकारी नवदीप सिन्वा होरें इक प्रैस कांफ्रेंस च जानकारी सांझी करदे होई दस्सेया जे 27 जनवरी गी

लगी दी बैठका च केंई सियासी पार्टियें मंग कीती ही जे इस प्रक्रिया लेई खीरी तरीक गी अगडे बधाया जा- जिसी ध्यानै च रक्खदे होई एह फैसला चुनां आयोग आसेया लैता गया ऐ। सियासी पार्टियें अपील कीती ही जे इस प्रक्रिया गी घट्टो-घट्ट इक महीने लेई अगडे बधाया जा। उंनं आखेया जे मतदाता सूचियें चा नां कटाने- नमें नां जोड़ने यां कोई गलती ठीक करने लेई दावे ते ऐतराज हून 6 मार्च धोड़ी दाखल कीते जाई सकदे न- तां जे मतदाता सूचियें च कोई गलती जां कमी-खामी नेंई रेही जा। प्रैस कांफ्रेंस च जानकारी दिती गेई जे चुनां आयोग- दाखल ऐतराजें ते दावें दी बिनाह पर सूचियें च लोड़चदा बदलाव 27 मार्च धोड़ी करी लैग ते जेहदे बाद फाइनल सूचि 10 अप्रैल गी प्रकाशित करी दिती जाहग।

<><><><><><>

Vaishnav Railway Stations

केंद्री रेल मंत्री अश्विनी वैश्वनव होरें आखेआ जे अमृत भारत स्टेशन योजना तैहत 170 रेलवे स्टेशनें दा नमें सिरेआ विकास आला कम्म पूरा करी लैता गेआ ऐ। राज्यसभा च इक सोआलै दा परता दिंदे होई वैश्वनव होरें आखेआ जे इस योजना तैहत विकास लेई 1 ज्हार 300 शा ते स्टेशनें दी पंछान कीती गेई ऐ। उंनं आखेआ जे प्रधानमंत्री नरेंद्र मोदी हुंदे नेतृत्व च रेलवे सैक्टर च बड्डे बदलाव होआ'रदे ना। वैश्वनव होरें आखेआ जे सरकार यात्रुएं दी सुरक्षा ते उनेंगी सहूलतां उपलब्ध करोआने बक्खी चेचा ध्यान देआ'रदी ऐ। केरल च रेलवे लेई फंड आवंटन बारै पुच्छे गेदे इक सोआलै दा परता दिंदे होई वैश्वनव होरें आखेआ जे इस बरे दे आम बजट च 3 ज्हार 795 करोड़ रपे दित्ते गए न जेड़ा कांग्रेस सरकार दरान दित्ते गेदे आवंटन थमां 10 गुणा मता ऐ।

<><><><><><>

ICC U-19 Cricket

भारत नै रिकार्ड 6मीं बारी U-19 विश्व कप दा खिताब अपने नां कीता ऐ। जिम्बाब्वे च होए दे खिताबी मुकाबले च भारत नै इंग्लैंड गी 100 रन्ज कन्नै हराया। भारतीय टीम नै पैहले बल्लेबाजी करदे होई वैभव सूर्यवंशी दे 175 रन्ज दी बढौलत तय 50 ओवर च 411 रन्ज दा बड्डा स्कोर बनाया। परते च इंग्लैंड दी टीम 40 ओवर ते 2 गेदें च 311 रन्ज पर सिमटी गेई। इंग्लैंड दी तरफा कालेब नै सब्भनें थमां मते 115 रन्जा बनाए। एह U-19 विश्व कप फाइनल च अजें तगर दी सब्भनें थमां मते फर्क आहली जित्त बी ऐ। वैभव गी “प्लेयर ऑफ द मैच” ते “प्लेयर ऑफ द सीरिज” चुनेया गया।

<><><><><><>

Prez. –Vice President

राष्ट्रपति द्रौपदी मुरमू- उपराष्ट्रपति सी.पी. राधाकृष्णन होरें U-19 –ICC विश्व कप 2026 जितने पर भारतीय टीम गी बधाई दिती ऐ। सोशल मीडिया दी इक पोस्ट च राष्ट्रपति मूरमू होरें टीम गी रिकार्ड 6मीं बारी खिताब जितने आस्तै ते पूरी प्रतियोगिता च कोई बी मैच नेंई हारनें लेई बदाई दिती। उप-राष्ट्रपति होरें टीम गी बदाई दिती। उंनं वर्ल्ड कप च रिकार्ड तोड़ पारी आस्तै वैभव सूर्यवंशी दी सराहना कीती।

<><><><><><>

PM - U-19

प्रधानमंत्री नरेन्द्र मोदी होरें 19 बरें थमां हेठली उमरी आहला U-19 विश्व कप जितने पर भारतीय क्रिकेट टीम गी बधाई दिती ऐ। इक सोशल मीडिया दी पोस्ट च प्रधानमंत्री होरें पूरी प्रतियोगिता च शानदार प्रदर्शन करने आस्तै खडारियें दी तारीफ कीती। प्रधानमंत्री होरें खडारियें गी अगगे दे जत्तें आस्तै शुभकामनां दितियां ते आखेया जे एह जित्त युवा खडारियें गी प्रेरित करोग।

<><><><><><>